

四庫全書

子部

欽定四庫全書

冊府元龜卷一百三十六 宋 王欽若等 撰

帝王部

慰勞

周禮小行人之職國師役則犒之所以省郵罷勞激勵壯武也詩云我姑酌彼金罍維以不永懷又以均錫宴飲昭示慈惠也自小雅之作厥義彌著施及後世斯可槩舉若乃遣帥徂征宿兵在野邊候方警戍守斯久迨

夫弔伐弭寧振旅凱入則必親迓戎輅巡省和門亦復
臨遣將臣申諭恩旨是古者撫士慰下勞還勤歸之道
也至於敦諭反側綏懷寇亂安輯降附案覆誥累成政
之大者良可述焉

周文王為西伯之時以殷王之命命將率遣戍役以守
衛中國故歌采薇以遣之出車以勞還杖杜以勤歸又
使臣以王事往來於其職於其來也陳其勤苦以歌樂
之故作四牡詩

漢高祖初為漢王二年十一月自廣武之間西入關至
櫟陽存問父老置酒留四日復如軍

文帝六年匈奴大入邊以宗正劉禮為將軍軍霸上祝
茲侯徐厲為將軍軍棘門以河內守周亞夫為將軍軍
細柳以備胡帝自勞軍

魏明帝景初二年司馬宣王為太尉帥師討公孫文懿
于遼東既平天子遣使者勞軍于薊

齊王正始二年司馬宣王破吳軍追至三州口斬獲萬

餘人收其舟船軍資而還天子遣中常侍勞軍於宛
嘉平三年司馬宣王帥中軍至甘城縛王凌以歸京師
天子遣侍中韋誕持節勞軍于五池

高貴鄉公甘露元年七月安西將軍鄧艾大破蜀大將
姜維於上邽詔曰兵未極武醜虜摧破斬首獲生動以
萬計自頃戰克無如此者今遣使者犒賜將士大會臨
饗飲宴終日稱朕意焉

陳留王即位使侍中衛瓘慰勞河北

晉武帝太康元年三月龍驤將軍王濬平吳詔遣使者
犒濬軍又遣兼侍中張側黃門侍郎朱震分使揚越慰
其初附

穆帝永和十年桓溫北伐進至霸上符健以五千人深
溝自固居人皆安堵復業持牛酒迎溫於路者十八九
耆老感泣曰不圖今日復見官軍初溫恃麥熟取以為
軍資而徧芟苗清野軍糧不屬收三千餘口而還帝使
侍中黃門勞溫於襄陽

海西公太和四年桓溫北伐至枋頭為慕容垂所敗溫甚耻之歸罪於袁真袁廢為庶人真怨溫誣已據壽陽以自固潛通苻堅慕容暉帝遣侍中羅含以牛酒犒軍於山陽使會稽王昱會溫於涂中

簡文咸安二年詔曰吾承祖宗洪基而昧於政道懼不能允釐天工克隆先業夕惕惟憂若涉淵水賴宰輔志德道濟伊望羣后竭誠協契斷金內外盡翼翼之規文武致匪躬之節真因斯道終克弘濟每念干戈未戢公

私疲悴藩鎮有疆理之務征戍懷東山之勤或白首戎陣忠勞未叙或行役彌久擔石靡儲何嘗不昧旦晨興夜分忘寢雖未能撫而巡之且欲達其此心可遣大使詣大司馬并問方伯逮于邊戍宣詔大饗求其所安又籌量賜給悉分周普

孝武大元八年謝玄謝琰桓伊等破苻堅詔衛將軍謝安勞旋師于金城

後魏孝文太和十七年十二月帝罷南伐巡省六軍

宣武正始三年四月詔遣使者巡慰北邊酋庶

永平元年鎮北將軍李坪討京兆王愉於冀州既平宣武遣無給事黃門侍郎秘書丞元梵宣旨慰勞

孝明孝昌元年徐州刺史元法僧叛入于梁梁遣其豫章王蕭綜入據彭城時安豐王延明為大都督大行臺率臨淮王彧等衆軍討之既而蕭綜降附徐州清復遣散騎常侍常景無尚書持節馳與行臺都督觀機部令時尚書令蕭寶寅都督崔延伯都督北海王顥都督車

騎將軍元嘗芝等並各出持詔詣軍宣旨勞問

又撫軍將軍兼行臺尚書源子雍破賊大破蕭寶寅佗
單步胡提于曲沃堡帝璽書勞勉之子雍在白水郡復
破阿非軍于白水郡多所斬獲詔遣侍中尚書令城陽
王徽於潼關宣旨慰勞

廢帝普泰初以李裔為持節散騎常侍安北將軍兼給
事黃門侍郎慰勞山東大帥

出帝永熙三年五月丁酉帝幸華林都亭集京城都督

及軍士三千餘人慰勉之

後周太祖為西魏相國大統八年十月北齊神武以衆
攻玉壁城晉州刺史韋孝寬拒之苦戰六旬神武夜遁
太祖嘉孝寬功令殿中尚書長孫紹遠左丞相王悅至
玉壁勞問授驃騎大將軍

武帝保定四年十月詔大冢宰護等伐齊丁卯幸沙苑
勞師癸酉還宮

建德五年東伐十二月次於晉州初齊攻晉州恐王師

卒至於城南穿塹自喬山屬於汾水煥戍帝帥諸軍八
萬人置陣東西二十餘里帝乘嘗御馬從數人巡陣處
分所至輒呼主帥姓名以慰勉之將士感見知之恩各
思自勵

隋煬帝以仁壽四年即位八月并州總管漢王諒反詔
左僕射楊素并州道行營總管討平之帝遣素弟脩武
公約齋手詔勞素曰我有隋之御天下也於今二十有
四年雖復外夷侵叛而內難不作脩文偃武四海晏然

朕以不天銜恤在疚號天叩地無所逮及朕本以藩王
謬膺儲副復以庸虛纂承鴻業然天下者先皇之天下
所以戰戰兢兢弗敢失墜况復神器之重生民之大哉
賊諒包藏禍心自幼而長羊質虎皮假託名譽不奉國
諱先圖叛逆違君父之命成莫大之罪誑惑良善委任
姦回稱兵內侮毒流百姓私假署置擅相謀戮小加大
少凌長民怨神怒衆叛親離為禍不同同歸於亂朕寡
兄弟猶未忍言是故開關門而待寇戢干戈而不發朕

聞之天生蒸民為之置君仰惟先旨每以子民為念朕
豈得枕伏苫廬顛而不救也大義滅親春秋高義周旦
以誅二叔漢啓乃戮七藩義在茲乎事不獲已是以授
公戎律問罪太原且逆子賊臣何代不有豈意今者近
出家國所歎荼毒甫爾便及此事繇朕不能和兄弟不
能安蒼生德澤未弘兵戈先動賊亂者止一人塗炭者
乃衆庶非唯寅畏天威亦乃孤負付屬薄德厚耻愧乎
天下公乃先朝功臣勲庸克茂至如皇基草創百物惟

始便匹馬歸朝誠識無至汴部鄭州風捲秋穽荆南塞
北若火燎原早建殊勲夙著誠節及獻替朝端具瞻惟
允爰弼朕躬以濟時難昔周勃霍光何以加也賊乃竊
據蒲州關梁斷絕公以少擊衆指期平殄高壁據嶮抗
拒官軍公以深謀出其不意霧廓雲除冰消瓦解長驅
北邁直趣巢窟晉陽之南蟻徒數萬諒不量力猶欲舉
斧公以稜威外討發憤於內忘身殉義親當矢石兵刃
暫加魚潰烏散僵屍蔽野積甲若山諒遂守窮城以拒

鉄鉞公董率驍勇四面攻圍使其欲戰不敢求走無路
智力俱盡面縛軍門斬將奪旗伐叛柔服元惡既除東
夏清晏嘉庸茂績於是乎在昔武安平趙淮陰空齊豈
若公遠而不勞速而克捷者也朕殷憂諒闇不得親御
六軍未能問道於上庠遂使劬勞於行陣言念於此無
忘寢食公乃建累世之元勲執一心之確志古人有言
曰疾風知勁草世亂有誠臣公得之矣方乃銘之常鼎
豈止書勲竹帛哉功之克諧哽歎無已稍令公如宜軍

旅務殷殊當勞慮故遣公弟指宣往懷迷塞不次素上表陳

言曰臣自惟虛薄志不及表州郡之下敢憚劬勞卿相之榮無階覬望然時逢昌運王業維始涓流赴海誠心屢竭輕塵集嶽功大人微徒以南陽里閭凡沛子弟高位重爵榮顯一時遂復入處朝端出總戎律受文武之任預帷幄之謀豈曰才能實繇恩澤欲報之德義極昊天伏惟陛下詔重日之明養繼天之德收臣於踈遠炤臣以光輝南服入就道之書春官奉肅成之旨然草木無心尚榮枯候時况臣有心寔自効無路晝夜迴徨寢食怵惕嘗恐朝露奄至虛負聖慈諒包藏禍心有自來矣因幸國哀便肆凶逆興兵晉代搖蕩山東陛下拔臣於日流授臣以戎律蒙心腹之寄稟平亂之規蕭王赤心人皆為死漢皇大度天下爭歸妖寇廓清豈臣之力曲蒙使臣弟約齋詔書問勞高旨峻筆有若天臨洪恩大澤同于海運雖百殞無以自酬

唐高祖初為唐王隋義寧二年四月勞東都旋師於長樂宮

武德元年十月遣右武侯大將軍龐玉率師西討帝幸開遠門勞將士而還

十一月秦王征薛仁果凱旋帝享勞旋師

三年四月秦王平并州帝遣司農卿韋雲起勞軍

四年三月益州道行營僕射竇軌率兵擊東都帝引其將校五百人宴賜而遣之

四月皇太子討張長遜迴班師帝於玄武門宴勞將士
賜帛各有差

五月王世充降遣尚書右僕射裴寂持節勞軍又遣侍
中陳叔達齎百牢上餽酒醢勞秦王於近郊

五年十二月皇太子建成與劉黑闥戰於魏州城下破
之黑闥抽軍北遁詔尚書右僕射裴寂馳往勞之

六年十月秦王屯并州以備突厥及班師帝迎勞於志
武塢

太宗貞觀十六年遣安西都護郭孝恪伐焉耆虜其王
齒龍突騎帝大悅置書勞之曰知破焉耆虜其偽王功
立威行深副所委但焉耆絕域地阻天山特遠憑深敢
懷叛逆卿望崇位重報效情深涉沙場躬行罰罪取
其堅壁曾不崇朝再廓遊魂遂無遺寇緬思竭力必大
艱辛超險成功深足嘉尚

十九年帝征遼二月李勣所領之衆頓於幽州詔遣通
事舍人盧師讓齋爾書詣軍中勞勉之將士咸悅

二十年六月平薛延陀詔曰朕聞獯獫強暴歷代憑凌
結晦闕都凝氣大漠家山宅野時獸聚而禽分幕毳廬
羶乍蠶屯而集塞退因利飽進為財饑前王弊其貪殘
中夏憚其薦食然而三策知慮非為禦寇之方千里長
城豈謂靜邊之計故以百王靡服千古不賓種落實繁
姦革孔熾武德之際飲馬渭濱貞觀之初敢恣凌逼朕
載懷慷慨命將出師旗鼓一臨沙漠大定雪涇陽之周
耻報白登之漢讐截瀚海以開池籠天山而築苑其餘

醜類自己羈縻勞我邊
軫余遐念將奮鈇鉞受命上
玄延陲惡積禍盈今日夷滅醜徒內潰凶黨外離契苾
送款來降其餘相率歸附唯僕骨同羅猶懷假息冰消
電碎匪夕伊朝豈朕威思所懷故乃蒼旻之惠觀賊此
勢何能自全今不乘機恐貽後悔故欲暫往靈州親自
招撫安邊靜亂下固毗基一軌同文永弘家業使萬里
之外不有半烽百郡之中猶無一戍永絕鎮防之役豈
非黎元樂見雖復去歲東征士馬倦勞甫施京邑曾未

踰年今秋復行理多疲頓但以良藥苦口非病者甘之
而人必焉思去膏肓之疾私種弊力豈農夫樂焉而必
履之求其倉庫之益斯皆忍小惡而成大美就輕害而
得殊功朕積疾累時今尚虛憊必欲牽疴就路以赴天
機百辟士庶幸勿辭也遼東從兵皆不差發布告天下
悉朕意焉

二十二年三月庚戌遣通事舍人韋燁往使歸兵道行
軍宣慰士衆是年右武侯將軍梁建方擊松外蠻破之

其帥盛遂稽六請降遣首領十人來謁軍門建方振旅而還及至帝勞其勤苦賜以上駟

高宗永徽四年十月以睦州女子陳碩真率衆反揚州長史房仁裕平之詔刑部尚書唐臨馳傳案覆被誣誤者悉免之人吏為賊所殺者官為殯斂

龍朔元年遼東道行軍總管蘇定方拔百濟之貞都城其王義慈來降遣左衛郎將王文庶齎書慰勞定方已下將士及百濟百姓各令安堵如舊有才者節級錄

用若能便經畧高麗者委定方揀擇將士可否聞奏

玄宗開元三年三月遣兵部員外郎王上客刑部員外郎楊欽明等分往諸軍宣慰將士

四年十二月命衛尉少卿李暉齋爾書慰勞朔方降戶九年九月詔曰如聞鹽夏兩州百姓及六州胡等被胡賊殺掠宜令御史韓朝宗皇甫翼齋書分往慰問便復損數其被損之家務令存恤應須給貸蠲免量事處置
訖迴日奏聞

十二年七月以黔州道招討使內侍楊思勗討溪州賊
帥有功特加輔國大將軍兼內侍祿俸防閤一事已上
並依品級宴思勗以下立功將士於朝堂謂曰蠻夷不
道賊害平人卿等竭誠一舉而定窮深盡險罔不率從
往返若飛當甚勞弊各賜卿少物宴畢領取

十五年涼州都督王君奭破吐蕃凱旋詔置酒朝堂宴
之及將士等並賜物有差帝謂君奭及將士等曰吐蕃
小醜敢懷逆命趣窺亭鄣以逞凶狂卿等智勇夙彰軍

威克振纔整旗鼓屢翦渠魁深入寇庭當甚勞耳

十六年二月乙未令朔方節度副大使左金吾大將軍
信安郡王禕宣慰嶺南

二十六年十月壬申命侍御史陳繇使於劔南安戎城
宣慰將士勅曰吐蕃醜類背約孤恩卿等同嫉寇讐為
國展效深入賊境久冒難危至於勤勞豈不知委項聞
在彼小有喪敗卿等非不盡力自是主將無謀古之用
兵在於責帥王昱緣此亦已貶官卿等但須悉心不可

因茲阻氣遞相激勵以保功名戰亡之人深可憫惜並
申弔祭用慰幽魂其病醫及陣亡之家宜委陳繇與州
縣相知優恤

天寶十四年十一月命榮王琬為元帥東征安祿山帝
御勤政樓宴將士

肅宗至德元年十月皇弟穎王璪陳王珪自蜀至上皇
有詔慰問朝臣及將士等

代宗寶應元年冬以初平河朔拜宗正少卿李涵左庶

子兼御史中丞河北宣慰使

廣德二年正月以尚書右丞顏真卿為刑部尚書兼御史大夫充朔方宣慰使

永泰元年七月遣尚書左丞李涵以本官兼御史大夫於河北道宣慰

大歷二年九月詔曰河朔一隅地方千里外捍夷狄內輔成周撫勤王之師脩任土之貢顧其方鎮可謂崇重眷我侯伯實有勲勞且將相朕之股肱兆庶君之支體

事同休戚寧忘鑒寢思撫巡而未獲念征鎮而永懷爰
命宗臣徃申旨諭銀青光祿大夫行尚書左丞襄武縣
開國公李涵朕之茂親腹心攸寄純固所以致命文質
所以經邦溫恭禮讓誠信易直勵匪躬之節秉憂國之
心美其公才當所委任再令宣撫皆合事宜既述慊誠
之詞兼陳理化之績慰我憂念意甚嘉之今秋冬在候
徃戍勤止將校有介胄之勞黎元有稅賦之役代予親
問詔爾使臣仍兼副相之勞式重登車之務可兼御史

大夫充河北宣慰使

三年六月命兵部侍郎李涵兼御史大夫充河北道宣慰使以幽州之難故也

六年八月命左散騎常侍孟皞使河北道宣慰

八年八月辛未幽州盧龍節度觀察等使檢校左散騎常侍幽州大都督府長史朱泚遣弟滔領防秋兵馬五千騎至自幽州詔發六軍將士千餘騎迓於國門許便道繇皇城南面出開遠門赴涇州行營命有司大置酒

於開遠門宴慰遣之騎卒精銳冠絕諸軍道路觀者如堵

十年正月命內侍孫知古使於魏州宣慰因曉示田承嗣各守封疆

德宗建中四年三月遣太子太師顏真卿宣慰淮寧節度李希烈

十二月帝在奉天加給事中孔巢父兼御史大夫淄青宣慰使以潼關防禦鎮國軍使華州刺史董晉為國子

祭酒兼御史大夫河北宣慰使

興元元年正月帝在奉天以兵部員外郎李克兼御史
中丞鎮冀宣慰使

四月帝在梁州以屯田郎中沈房為太常少卿兼御史
中丞諸蕃計會及安西北庭宣慰使

六月乙巳詔曰朕獲承先顧付以大器懼德不類貽列
聖羞虔恭惕厲罔敢暇逸將期布令齊一致俗和平然
而誠信未孚衆心遂阻理化非當百度失中君臣之間

鬱堙不達致寇雖深於罪已興戎尚昧于省躬思靖亂
以濟人反勞師而黷武行者被殺傷之苦居者重齋送
之勤四海騷然靡有寧處京邑之下轉軸亦空環列之
中徵發靡息畧內以勤遠居安而忘危賊臣誘姦乘間
竊發豺狼穢于宮闕士庶陷于塗炭作威肆毒仇視我人
萬姓嗷嗷呼天無告有隕路以抗節有脅從以假命且
一夫不獲辜實在予况君臨萬邦作人父母既不克以
覆育又從而咎之其心愧耻一食三歎出舍內省介于

梁岷庶乎有瘳以答譴戒皇天悔禍社稷降靈腹心爪
牙奮謀宣力元惡稔慝脫身遁逃餘孽拒威所向摧殄
掃氛沴而闢閭闔翦鯨鯢以清郊原函夏載寧室家相
慶非我將相夾輔王室卿士交脩予違軍旅協心畢命
盡敵豈伊寡昧克復興運戡定大難念之感懷宜令吏
部侍郎班宏充宣慰使勞問將士撫諭蒸黎必躬必親
如朕臨蒞朕整飭法駕即日還京策勲行賞大報忠烈銘功
百代與國同休然後請罪祖宗不敢自蔽宣布中外明

朕意焉

七月命給事中兼御史大夫孔巢父宣慰於河東諸軍
貞元元年六月以兵部侍郎李紆宣慰于河東諸軍中
書舍人齊映宣慰于朔方河中同絳陝虢等州諸軍兵
部尚書崔漢衡宣慰于幽州

二年四月淮西李希烈平命尚書左丞鄭叔則往淮西
宣慰詔曰自希烈叛命於今五年王澤不通下情亦沮
所宜宣我信命以釋危疑敷我惠和以慰傷瘵滌清汙

俗咸與惟新底綏一方以稱朕意

十六年七月以徐州張建封卒其子悛為將校所迫俾領軍務詔擇臨難不懼者即其軍以諭之遂命吏部員外郎李鄴為宣慰使

宣慰
憲宗元和元年正月庚午詔萬年縣令薛彤赴彰義軍宣慰

二年八月戊寅命給事中房式充幽州成德義武等軍宣慰使時三節度劉濟王士貞張茂昭各持宿嫌交惡

聞於朝故有是命

四年八月命京兆少尹裴武宣慰於鎮州

十二月以太府卿鄧泳為東道行營諸軍宣慰使左武衛大將軍田景度為北道行營諸軍宣慰使

十年正月丙戌以左羽林軍李文通為左金吾衛將軍兼御史中丞充壽州宣慰使

十一年五月丁亥易定節度使渾鎬以累敗承宗之衆上聞即日命使宣勞

六月庚子命給事中柳公綽宣慰于淄青右補闕張宿為判官

八月命尚書右丞許孟容宣慰汴宋陳許河陽行營諸軍

十一月己巳命比部員外郎張宿宣慰隨唐等州軍
十三年正月庚寅命諫議大夫張宿往淄青宣慰李師道以起居舍人唐敬休為副宿至東都暴卒命左常侍李遜宣慰于淄青仍依前以唐敬休副之

十四年二月壬戌魏博田弘正奏淄青兗鄆十二州平
詔戶部侍郎楊於陵以本官兼御史大夫充淄青宣撫
使

六月癸酉制曰周禮政官之屬掌導王志以巡天下之
邦國六郡統臨二庭緜邈居必申儆動當懾懷自項東
夏有虞近郊多壘沙朔之外剪為寇戎亭障烽櫓之嚴
遐張塞下使譯道途之要遠屬湟中今妖氛甫清師旅
方息思欲肅關隴之右地制昆夷於盛秋而慮師無見

糧卒有虛籍之守禦之全備積愁歎之餘音臨軒永懷
宜俾宣導非夫忠良練達文武兼資信厚足以得人心
恪恭足以奉王事則何以膺茲選任布我憂勞至於問
戍役之勤詳山澤之要稽軍實之名數計餽餉之盈虛
宿弊有未除衆情有未達兵機虜態一以上聞異在此
行所至循拊宜令左金吾衛大將軍兼御史大夫胡証
充京西京北巡邊使所經過州鎮與節度防禦使刺史
審量利害具事實聞奏因程昇之請也

穆宗以元和十五年正月即位二月命監察御史楊虞卿盧周仁高銖路羣分徃京西京北監賞設將士

十月成德軍節度王承宗卒弟承元密獻忠款命起居舍人栢耆徃鎮州宣慰

十一月命諫議大夫鄭覃徃鎮州宣慰以起居舍人王璠副之

長慶元年正月丁巳以京兆府司錄參軍溫造為太原鎮州等道宣慰使以王承元請入朝也

二月辛未命給事中韋弘景為容州邕州安南宣慰使
監察御史杜周士副焉

九月辛亥遣太子中允兼侍御使李察往幽州宣慰

二年正月命太子中允李察宣慰深州及魏博行營以
鎮州兵亂殺節度使田弘正而牛元翼不從亂固守深
州也

二月詔雪鎮州王廷湊仍令兵部侍郎韓愈充宣慰使
又命戶部郎中崔護宣慰於昭義軍時劉悟為昭義節

度監軍劉承偕頗恃恩權嘗對衆辱悟又縱其下以亂法悟不能平異日有中使至承偕宴之請悟悟欲往左右皆曰往則必為其困辱矣軍衆因亂悟不止之遂擒承偕至牙門殺其二僮欲并害承偕悟救之獲免故有慰撫之命

七月甲寅命司勳郎中崔護均王府長史李彥璋分往昭義魏博兩道宣慰又以汴州李叡叛命光祿少卿李察宣撫汴州

文宗太和元年十一月天平橫海等軍節度使烏重胤卒命吳守志宣慰鄆州仍領繒帛五萬疋就賜軍士以鄆帥新歿撫而安之也

二年二月辛亥命司封郎中王彥魏博宣慰

五月命左散騎常侍馮宿往河南道行營宣慰以滄州李同捷拒命而諸軍進討也

七月命諫議大夫柏耆往昭義宣慰

十二月又命柏耆往魏博宣慰仍與河陽滑州計會發

軍便以兩處兵勢曉喻魏博將士令知赴救之師四面皆至

三年正月命鴻臚卿張賈往昭義魏博宣慰

三月命諫議大夫柏耆往德州城下宣慰

五月命給事中崔瑄往幽州宣慰中書舍人韋詢往德州宣慰

四年正月勅諫議大夫崔戎宜充劔南西川宣撫使以南蠻入寇也

二月興元三軍作亂節度使李絳及家並被處置訖命給事中崔瑄充山西道宣慰使戶部員外郎嚴蹇為副又命中使先義逸赴興元宣慰

武宗會昌三年七月以御史中丞李回使幽鎮魏三道時中書奏云秋氣已至將議進軍幽州須早取可汗鎮魏須速平劉楨各要遣使諭旨兼探三鎮軍情今日延英面奉聖旨欲遣張賈充使臣等商量張賈幹濟有才甚諳軍中體勢然性氣稍直慮不安帖恐不如且輟李

回充使若以臺綱不可暫闕即兵部侍郎鄭淮久充戎鎮判事精敏雖無詞辨言亦分明官重事閒最似相稱帝乃以李回使焉

昭宗乾寧二年十二月以前大理卿李垞為黔中宣慰使制曰將我詔命使於四方必惟其人矧乃舊服浴於輔相僉曰汝諧用之不疑行矣思濟李垞國朝名相之令嗣也文行器業雅有家風政事規為克紹先志踐履函便於中外練達深得其本根項鎮黔江洽聞善政四

年問俗五郡懷仁恩信被於昆夷盛名振於縣道尋移
旌蓋徃理桂林載揚休聲屢著嘉績兩地遺愛萬人去
思今聞黔巫易帥之時頗失睦隣之道慮成間隙又動
干戈念遠俗之無辜向中宵而不寐昇爾揆路為吾使
星尚念漢地人情必懷龔遂河內風俗未忘寇恂宜其
宣我憂勤導予宵旰强者抑之弱者撫之無俾黔人又
墮塗炭用爾專達膺予簡求佇其嚮風聞爾稱職殊恩
好爵無所恡焉

後唐莊宗同光四年二月丁巳遣宣徽使宋唐玉往鄴
都宣諭諸軍

明宗天成二年四月有內臣自荆南至云暑雨方甚兵
士苦之及劉訓有疾是日差孔循徑往勞問及續賜孔
循詔曰朕以荆門伐叛方委勲臣而聞統帥縈切戎機
勤劬王事致乖攝理深軫寤懷輟卿樞近之繁達我優
隆之旨固於旬朔已就宣和苟或尚未全平且要暫還
本道便於將息亦可允俞委卿精白凡事詳酌審於準

節庶協籌謀料度攻收撫綏軍旅咸繫明畧更集殊庸
倚注之心再三在念

九月戊午北面屯戍上言經夏戰馬多死是日出內廐
馬三百匹賜之帝猶慮邊將憂慮召來人慰諭之曰盛
夏酷熱人尚多疾其況馬邪但令勉於王事無以此為
恐仍以槍劍賜其主將又曰沿路芻粟館驛相接爾慎
勿擾人

三年六月命閣門使馮知兆往定州犒宴將校

末帝清泰元年十二月壬申遣李讓勳馳騎代北犒享
防邊將士

三年八月詔端明殿學士呂琦往河東代諸屯戍犒軍
晉少帝天福九年三月契丹至河北帝親征駐蹕澶淵
丙午先鋒指揮使石公霸遇敵數萬騎於戚城之北為
敵所圍高行周符彥卿在戚城之東南方息於林下忽
聞敵至駭愕督軍而進纔數千騎衆寡不較行周遣人
馳告景延廣請益師延廣遲留候帝進止既而行周等

為賊圍之數重三人大譟瞋目奮擊敵衆傷死者甚衆
帝自御親兵援之前軍獲免帝登威城南古臺置酒以
勞二將

漢高祖天福十二年十月討杜重威於魏府二十日帝
乘馬環城幸副部署慕容彥超尚洪千聶章周殷等營
遍加撫喻衆心咸懾

十一月將伐鄴壬午車駕次長垣因賜宰臣賈貞固蘇
逢吉蘇禹珪李濤及從官食帝曰朕少親戎馬險阻艱

難備嘗之矣公等儒臣也從朕蒙犯霜露得無勞苦乎
羣臣蹈舞稱謝

周太祖廣順二年五月親征兗州至兗州城下於西屯
寨下慰勞兵士賜監押使臣將校茶酒

十一月荆南上言覘知湖南事宜朗州大將劉言十月
三日以兵入長沙界十五日至潭州其淮南所署偽節
度使邊鎬焚城而遁岳州偽刺史宋權亦棄城去帝遣
供奉官齊藏琦乘駟往湘潭慰撫三軍將吏

三年九月涇州節度使史懿疾復作遣客省使楊廷章
往知州事賜襲衣金帶縑帛詔諭彰義軍民吏曰朕以
史懿自鎮邊蕃克勤王事眷言勲舊深副倚毗爰自近
年多嬰疾苦邇來頻有發動乞赴闕尋醫既覽奏陳須
議俞允已差客省使楊廷章往彼知軍州事即令史懿
發來京師朕念涇州久夾瘡痍之地軍人百姓撫愛皆
同今已指揮楊廷章候到日凡事倍加撫安不得輒有
科率俾令衆庶皆遂蘇舒

世宗顯德元年五月親征河東丁丑觀兵於城下帝巡撫諸軍親自慰免賜賚有差

五年四月丁丑吳越王錢俶上言四月十日夜杭州火
泐燒府署殆盡帝憫之遽命內臣齎書恤問

冊府元龜卷一百三十六

欽定四庫全書

冊府元龜卷一百三十七 宋 王欽若等 撰

帝王部

旌表

王者甄明高義顯異至行所以激揚風化敦率人倫也
蓋天下至大士民至衆不可家喻而戶曉故顯其忠所
以勵事君也褒其孝所以勸事親也尊賢者所以聳善
也表烈士所以興義也或授之爵秩或祿其子孫或旌

其門閭或賜以穀帛以至復其征賦申以祠祀皆因事以立教獎一而勸百故能述宣王度丕變薄俗民德歸厚有耻且格蓋上之行化速於置郵下之從風易如偃草絲斯道矣

周武王既克商釋箕子之囚封比干之墓表商容之閭惠王二十一年齊會諸侯伐楚許穆公卒於師葬之以侯禮

凡諸侯薨於朝會加一等死王事加二等於是有所以哀歛

漢高帝五年既平項羽齊王田橫迺與其客二人乘傳

詣雒陽至尸鄉自剄令二客奉其頭馳奏之高帝曰嗟
乎有以起布衣兄弟三人更王臣欽若等曰三人謂儋榮及橫豈非賢
哉為之流涕而拜其二客為都尉發卒二千以王者禮

葬橫

十二年十二月詔曰秦皇帝楚隱王陳勝魏安釐王昭王之

齊愍王宣王之趙悼襄王孝成王之皆絕亡後其與秦始皇

帝守塚二十家楚魏齊各十家趙及魏公子無忌各五

家無忌即信陵君也令視其冢復無與他事初帝微少時數聞

魏公子無忌賢及即天子位每過大梁嘗祠公子至是擊黥布還為公子置守冢五家世世歲以四時奉祠公子

成帝時為霍光置守冢百家吏卒奉祠焉

平帝元始二年詔曰漢興以來股肱在位身行儉約輕財重義未有若公孫弘者也位在宰相封侯而為布被脫粟之飭奉祿以給故人賓客無有所餘可謂減於制度

禮貴有嘗尊
衣服有品

而率下篤俗者也與內富厚而外為詭

服以鈞虛譽者殊科夫表德章義所以率世勵俗聖王之制也其賜弘後子孫之次見為適者爵關內侯食邑三百戶

後漢光武時來歙攻公孫述為刺客所中自書表訖投筆抽刀而絕帝聞大驚省書覽涕乃賜策曰中郎將來歙攻戰連年平定羗隴憂國忘家忠孝彰著遭命遇害嗚呼哀哉使太中大夫贈歙中郎將征羗侯印綬謚曰節侯謁者護喪事還雒陽乘輿縞素臨弔送葬以歙有

平羗隴之功故改汝南之當鄉縣為征羗國焉

常少張隆初事公孫述少隆皆勸述降述不從並以憂死及述既滅帝下詔贈少為太常隆為光祿勲以禮改葬之其忠節志義之士並蒙旌顯

劉茂太原人為郡門下掾建武二年赤眉二十餘萬衆攻郡縣殺長吏及府掾史茂負太守孫福踰牆藏空穴中得免其暮俱奔孟縣晝則逃隱夜求糧食積百餘日賊去乃得歸府明年詔書求天下義士福言茂曰臣前

為赤眉所攻吏民懷亂奔走趣山臣為賊所圍命如絲
髮賴茂負臣踰城出保孟縣茂與弟觸冒兵刃緣山負
食臣及妻子得度死命節義尤高宜蒙表擢以勵義士
詔書即徵茂拜議郎

譙玄巴郡閬中人也說易春秋公孫述遣使者備禮
徵之若不起便賜以毒藥玄受毒藥其子瑛泣血叩頭
於太守奉錢十萬以贖父死述許之玄遂隱藏田野終
述之世建武十一年卒明年天下平定玄弟慶以狀詣

闕自陳帝美之策詔本郡祠以中牢勅所在還玄家錢
李業廣漢梓潼人也公孫述聞業賢徵之業固疾不起
述羞不致之乃使大鴻臚尹融持毒酒劫業業遂飲毒
而死蜀平帝詔曰表其閭益部載其高節圖畫形像

溫序為護羌校尉毘蠶別將苟宇所拘伏劔而死主簿
韓遵從事王忠持其屍歸歛帝聞而憐之命忠送喪歸
雒陽賜城傍為冢地賜穀千斛縑五百疋除三子為郎

中

李善涇陽人本同縣李元蒼頭也元死唯孤兒續始生數旬貲財十萬諸奴婢欲殺續而分其財善不能制乃負續逃亡瑕丘界中十餘歲與歸本縣脩理舊業時鍾離意為瑕丘令上書薦善行狀帝詔拜善及續並為太子舍人

明帝永平二年十一月遣使者以中牢祠蕭何霍光帝謁陵園過式其墓

姜詩廣漢人事母至孝母好飲江水嗜魚膾夫婦力作

供膳舍側忽有涌泉味如江水每旦輒出雙鯉嘗以供
母膳永平三年察孝廉帝詔曰大孝入朝凡諸舉者一
聽平之繇是皆拜郎中

章帝建初七年西巡狩幸長安以中牢祠蕭何霍光
元和二年東巡狩至沛使使祠故六安郡丞桓譚冢鄉
里以為榮

和帝永元二年十一月有事於十陵遣使者以中牢祠

蕭何曹參

蕭何墓見上註曹參墓在長陵旁道北

安帝永初二年劉雄為平原令劇賊平豪等入平原界
雄將吏士乘船追之至厭次河與賊合戰雄敗執雄以
矛刺之時小吏所輔前叩頭求哀願以身代雄豪等縱
雄而刺輔貫心洞背而死東郡太守捕得豪等具以狀
上詔書追傷之賜錢二十萬除父奉為郎中

元初中鮮卑數百餘騎寇漁陽太守張顯率吏士追出
塞遙望虜營煙火急趣之兵馬掾嚴授慮有伏兵苦諫
止不聽鮮賊入進授不獲已前戰伏兵發授身被十創

歿於陣顯拔刃追散兵不能制虜射中顯主簿衛福功
曹徐咸遽赴之顯遂墮馬福以身擁蔽虜并殺之朝廷
愍授等節詔書褒歎厚加賞賜各除子一人為郎中

延光三年幸長安以中牢祠蕭何曹參霍光

桓帝延熹三年武陵蠻寇江陵荊州刺史劉度謁者馬
睦南郡太守李肅並奔走肅主簿胡爽扣馬諫止肅遂
殺爽而走帝聞之徵肅棄市度睦減死一等復爽門閭
拜家一人為郎中

王渙為雒陽令以平正居身得寬猛之宜元興元年病卒民思其德為立祠安陽亭

延熹八年特詔密縣存故太傅卓茂廟雒陽留王渙祠焉靈帝中平中陳實子紀字元方遭父憂每哀至輒嘔血絕氣雖衰服已除而積毀消瘠殆將滅性豫州刺史嘉其至行表上尚書圖象百城以勵風俗

袁秘汝南汝陽人也為郡門下議生黃巾起秘從太守趙謙擊之軍敗秘與功曹封觀主簿陳端門下督范仲

禮賊曹劉禕德主記史丁子嗣記室史張仲然等七人
拔办突陣與戰並死謙以得免詔復秘等門閭號曰七
賢

獻帝初即位遣使弔祠故太傅陳蕃大將軍竇武又贈
射聲校尉沮偽為弘農太守旌死節也

王允為司徒為李傕郭汜所害後帝遷都於許思允忠
節使改殯葬之遣虎賁中郎將奉策弔祭賜東園秘器
贈以本官印綬送還本郡封其孫黑為安樂亭侯食邑

三百戶

元尚為兗州刺史袁術將僭號欲以尚為太尉尚拒之
建安初逃還為術所害其後尚喪與太傅馬日磾喪俱
至京師帝嘉尚忠烈為之咨嗟詔百官弔祭拜子瑋郎
中而日磾不與焉

魏太祖北征柳城過涿郡令告太守曰故北中郎將盧
植名著海內學為儒宗士之楷模國之楨幹也昔武王
入殷封商容之間鄭喪子產而仲尼隕涕孤到此州嘉

其餘風春秋之義賢者之後有異於人敬遣丞掾脩墳墓并致薄醑以彰厥德植仕漢為尚書以老疾去官隱居上谷軍都山獻帝初平三年卒

衛茲字公振陳留襄邑人也少有大節不應三公之辟太祖初至陳留茲曰平天下者必此人也太祖亦異之數詣茲議大事從討董卓戰於滎陽而卒太祖每涉郡境輒遣使祠焉

應余為南陽郡功曹宛將侯音劫射太守東里衮余以

身捍袞前被七創而死及征南將軍曹仁討平音表余
行狀並脩祭醊太祖聞之嗟嘆良久下荊州復表門閭
賜穀千斛

文帝行幸自譙過梁遣使以太牢祀漢太尉橋玄

黃初初大理王朗與太尉鍾繇連名表上主簿趙郡張
登昔為本縣主簿值黑山賊圍郡登與縣長王雋帥吏
兵七十二人直往赴救與賊交戰吏兵散雋殆見害登
手格二賊以全雋命又守長夏逸為督郵所枉登身受

考掠理逸之罪義濟二君宜加顯異兼稱登在職勤勞

詔曰登忠義彰著在職功勤名位雖卑直亮宜顯褒賸

近任當得此吏今以登為太官令

朗太祖初已曾表聞太祖以所急者多未

遣樊擢至是復表之乃有此命

明帝青龍中東征乘輦入故豫州刺史賈逵祠詔曰昨過項見賈逵碑像念之愴然古人有言患名之不立不患年之不長逵存有忠勲沒而見思可謂死而不朽者矣其布告天下以勸將來

齊王嘉平中吳將諸葛恪圍於合肥新城時城中遣士
劉整及鄭像出城傳消息皆為所執皆守節不回為其
所害後毋丘儉上言因下詔曰夫顯爵所以褒元功重
賞所以寵烈士整像召募通使越陷重圍冒突白刃輕
身守信不幸見獲抗節彌厲揚六軍之大勢安城守之
懼心臨難不顧畢志傳命昔解揚執楚有隕無貳齊路
中大夫以死成命方之整像所不能加今追賜整像爵
關中侯各除士名使子襲爵如部曲將死事科

高貴鄉公甘露二年四月詔曰玄菟郡高顯縣吏民反叛長鄭熙為賊所殺民王簡負擔熙喪晨夜星行遠致本州忠節可嘉其特拜簡為忠義都尉以旌殊行

七月車駕東征屯項復入賈逵祠下詔曰逵沒有遺愛歷世見祠追聞風烈朕甚嘉之昔先帝東征亦幸於此親發德音褒揚遠美徘徊之心益有慨然夫禮賢之義或掃其墳墓或脩其門閭所以崇敬也其掃除祠堂有穿漏者補治之

八月詔曰昔燕刺王謀反韓宜等諫而死漢朝顯登其子諸葛誕創造凶亂主簿宣隆部曲督秦絜秉節守義臨難固爭為誕所殺所謂無比干之親而受其戮者其以隆絜子為騎都尉加以贈賜光示遠近以殊忠義三年六月丙子詔曰昔南陽郡山賊擾攘欲劫質故太守東里袞功曹應余獨身捍袞遂免於難余顛沛隕斃殺身濟君其下司徒署余孫倫使蒙仗節之報

晉武帝詔曰蜀將軍傅僉前在閔城身拒官軍致命不

顧僉父彤復為劉備戰亡天下之善一也豈繇彼此以
為異僉息著蔓後沒入官免為庶人

泰始四年以東海劉儉有至行拜為郎中

五年詔諸葛亮孫京隨才署吏

李密字令伯捷為人也父早亡母更適人密見養於祖
母蜀平後帝徵為太子洗馬密上疏曰臣生孩六月慈
父見背行年四歲舅奪母志祖母劉愍臣孤弱躬見撫
養臣無祖母無以至今日祖母無臣無以終餘年母孫

二人更相為命是以區區不敢廢遠臣今年四十有四
祖母劉今年九十有六是臣盡節於陛下之日長報養
劉之日短也烏烏私情願乞終養臣之辛苦非徒蜀之
人士及二州牧伯所見明知皇天后土實所共鑒願陛
下矜愍愚誠聽臣微志庶劉僥倖保卒餘年臣生當墮
首死當結草臣不勝犬馬怖懼之情帝覽表曰宓不空
有名也嘉其誠歎賜奴婢二人下郡縣供養其祖母

惠帝永康元年詔以光祿大夫劉頌誅賈謚督攝衆事

有功追封梁鄒縣侯食邑千五百戶

索靖太安末為游擊將軍領雍秦涼義兵與賊戰被傷而卒追贈太常後贈司空追封安樂亭侯謚曰莊

周處義興陽羨人也為御史中丞征氏人齊萬年力戰而沒帝追贈平西將軍賜錢百萬葬地一項京城地五十畝為第又賜其家近田五頃詔曰處母年老加以遠人朕每愍念給其醫藥酒米賜以終年

劉殷新興人也性至孝曾祖母王氏盛冬思董而不言

食不飽者一旬矣殷時年九歲乃於澤中哭不絕聲者半月董為生焉太傅楊駿輔政備禮聘殷殷以母老固辭駿於是表之優詔遂其高志聽終色養勅所在供其衣食蠲其徭賦賜帛二百疋穀五百斛

元帝為左丞相承制以嵇紹死節事重而贈禮未副勲德表贈太尉祠以太牢及即位賜謚曰忠穆復加太牢之祀

虞悝長沙人也與弟望並有士操譙王承之討王敦以

惺為長史望為司馬督諸軍湘東太守鄭澹敦之姊夫也不順承旨遣望討之望率一旅直入郡斬澹以徇四境及魏又來攻望每先登力戰而死城破惺復為人所執將害之子弟對之號泣惺謂曰人生有死闔門為忠義鬼亦何恨哉及王敦平贈惺襄陽太守望滎陽太守遣謁者至墓祭以少牢

許孜東陽吳寧人也惠帝元康中郡察孝廉不起巾褐終身年八十餘卒於家邑人號其居為孝順里咸康中

太守張虞上疏曰臣聞聖賢明訓存乎舉善褒貶所興不遠千載謹案所領吳寧縣物故人許孜至性孝友立節清峻與物恭讓言行不貳當其奉師則在三之義盡及其喪親實古今之所難咸稱殊類致感猛獸弭害雖臣不及見然備聞斯語竊謂蔡順董黯無以過之孜沒積年其子尚在性行純慤今亦家於墓側臣以為孜之履操世所希逮宜標其令跡甄其後嗣以疇既往以獎方來春秋傳曰善善及其子孫臣不達大體請臆量議

疏奏詔旌表門閭蠲復子孫

卞壺為尚書令右將軍蘓峻稱兵壺苦戰死之二子矜
旰見父沒相隨赴賊同時見害矜子誕嗣咸康六年成
帝追思壺下詔曰壺立朝忠恪喪身兇寇所封懸遠租
秩薄少妻息不贍以為慨然可給實口廩其後盜發壺
墓尸僵髮髮蒼白面如生兩手悉拳爪甲穿達手背安
帝詔給錢十萬以脩塋兆

虞潭母孫氏吳郡富春人吳大帝族孫女也永嘉末潭

為南康太守值杜弢構逆率眾討之孫氏勉潭以必死之義傾其資產以餽戰士潭遂克捷及蕪峻作亂潭時守吳興又假節征峻孫氏戒之曰吾聞忠臣出孝子之門汝當捨生取義勿以吾老為累仍盡發其家僮令隨潭助戰質其所服環珮以為軍資于時會稽內史王舒遣子允之為督護孫氏又謂潭曰王府君遣兒征汝何為獨否潭即以子楚為督護與允之合勢其憂國之誠如是拜為武昌侯太夫人加金章紫綬潭立養堂於家

王導以下皆就拜謁咸和末卒年九十五成帝遣使弔祭謚曰定夫人

張茂妻陸氏吳郡人也茂為吳郡太守被沈充所害陸氏傾家產率茂部曲為先登以討之充敗陸詣闕上書為茂謝不尅之責詔曰茂夫妻忠誠舉門義烈宜追贈茂太僕

穆宗升平中慕容恪侵逼山陵時冠軍將軍陳祐守雒陽衆不過二千時有沈勁者少負志節自表求配祐効

力因以勁補冠軍長史令自募壯士得千餘人以助祐
擊賊頻以寡制衆而糧盡援絕祐懼不能保全會賊寇
許昌祐因以救許昌為名興寧三年留勁以五百人守
城祐率衆而東會許昌已沒祐因奔崖塢勁志欲効命
欣獲死所尋為恪所攻城陷被執神氣自若恪竒而將
宥之其中軍將軍慕容虔曰勁雖竒士觀其志度終不
為人用今若赦之必為後患遂遇害恪還從容言於慕
容暉曰前平廣固不能濟辟閭今定雒陽而殺沈勁實

有愧於四海朝廷聞而嘉之賜東陽太守子赤黔為大長秋

毛寶為征虜將軍豫州刺史州陵縣開國侯守邾城石季龍遣將攻邾城城陷寶率左右突圍出赴江溺死穆帝詔曰寶之傾敗宜在貶裁然蘓峻之難致力王室今咎其過故不加贈祭之可也其後公卿言寶有重勳加死王事不宜奪爵昇平三年乃下詔復本封

孝武太元中功臣普被減削司空何充等止得六家守

冢以故司空興平伯陸玩有佐命之勲先陪陵而葬繇
是特置興平伯官屬以衛墓

又詔曰褒德顯仁哲王令典故左尉忠穆公

穆紹也

執德

高邈在否彌宣貞潔之風義著千載每念其事愴然傷
懷忠貞之裔烝嘗宜遠所以大明至節崇獎名教可訪
其宗裔襲爵主祀

丁穆為順陽太守苻堅兵至為其所執至長安稱疾不
仕偽朝堅又傾國南寇穆與關中人士唱義謀襲長安

事泄遇害臨死作表以付其妻周其後周得至京師詣闕上之帝下詔曰故順陽太守貞定侯丁穆力屈身陷而誠節彌固直亮壯勁義貫古烈其喪柩始反言尋傷悼可贈龍驤將軍雍州刺史賻賜一依周虓故事為置屋宅并給其妻衣食以終厥身

周虓為西夷校尉領梓潼太守陷於苻堅不屈節而死其子興迎致其喪冠軍將軍謝玄親臨哭之因上疏曰臣聞旌善表功崇義明節以振揚聲教垂美來葉故西

夷校尉梓潼太守周虓執心忠烈勵節寇庭遂嬰禍荒
裔痛冥泉壤臣每悲其志以為蘇武之賢不復過也前
宣告并州訪虓喪并索其家負荷數千始得來至即以
資送還其舊隴伏願聖朝追其忠心表其殊節使負霜
之志不墜於地則榮慰存亡惠被幽顯矣帝詔曰虓厲
志貞亮無愧古烈未及拔身奄隕厥命旣表義節國之
典也贈龍驤將軍益州刺史賻錢二十萬布百疋又贍
賜其家

謝琰隆安四年討孫恩兵敗琰帳下督張猛於後斫琰馬琰遂遇害後左里之捷宋高祖令擒猛送琰小子混混剗肝生食之詔以琰父子殞於君親忠孝萃於一門贈琰侍中司空謚曰忠肅二子肇峻肇歷驃騎參軍峻以琰勲封建昌侯及沒於賊詔贈肇散騎常侍峻散騎侍郎

安帝義熙初檀憑之與桓玄將皇甫敷戰死賜冀州刺史詔曰夫旌善紀功有國之通典沒而不朽節義之篤

行故冀州刺史檀憑之忠烈果毅亡身為國既義敦其情故臨危授命考諸往迹古人無以遠過近者之贈意猶恨焉可加贈散騎常侍本官如故既隕身王事亦宜追論封賞可封曲阿縣公邑三千戶

孫季高義熙中討盧循於番禺循走交州季高病卒贈龍驤將軍宋高祖為南海太守念季高之功乃表曰孫季高嶺南之勲已蒙褒贈臣更思惟盧循稔播也惡一紀

據有全城若令根本未拔投奔有所招合餘燼猶能為

虞懸師遠討方勤廟筭而季高汎海萬里投命洪流波
激電邁指日邁至遂奄定南海覆其巢窟使循進退靡
依輕舟遠遁曾不旬月妖凶殲殄蕩滌之功實此為大
往年所贈猶為未優愚謂宜更贈一州即其本號庶令
忠勲不湮勞臣增厲重贈交州刺史將軍如故

何無忌義熙二年遷都督江荆二州進鎮南將軍征盧
循兵敗握節死之詔曰無忌秉哲履正忠亮明允亡身
殉國則契協英謨經綸屯昧則重氛載廓及敷政方夏

實播風惠妖寇搆亂侵擾邦畿投袂致討志清王畧而
事出慮外臨危彌厲握節隕難誠貫古賢朕用傷慟於
厥懷其贈侍中司空本官如故謚曰忠肅

毛瓌為征西將軍督益梁秦寧涼五州軍事譙從之亂
瓌遇害及瓌弟瑾瑗子姪之在蜀者一時殄沒瓌子弘
之嗣義熙中時延祖為始康太守上疏訟瓌兄弟於是
詔曰故益州刺史瓌西夷校尉瑾蜀太守瑗勤王忠烈
事乖慮外葬送日近益懷惻愴可皆贈先所授官給錢

三十萬布三百疋論璆討桓玄功追封歸鄉公千五百戶又以祐之斬玄功封夷道縣侯

後魏道武平中原贈李勰宣威將軍蘭陵太守勰恬靜好學有聲趙魏間至是已亡帝哀惜之故有是命

王憲字顯則北海劇人祖猛苻堅丞相父休河東太守憲幼孤隨伯父永在潁苻丕稱尊號復以永為丞相永為慕容永所殺憲奔清河匿於民家皇始中輿駕次趙郡之高邑憲乃歸誠帝見之曰此王猛孫也厚禮待之

以為本州中正領選曹事兼掌門下

太武討赫連經庾岳墓宅愴然動容遂下詔為立廟令
一州之民四時致祭岳先事道武為將有謀畧名冠軍
中道武猜忌誅之

段進為白道守將蠕蠕大檀入塞圍之力屈被執進抗
聲大罵遂為賊所殺帝愍之追贈安北將軍賜爵顯美
侯謚曰莊

石文德中山蒲陰人也有行義真君初縣令黃宣在任

喪亡宣單貧無碁親文德祖父苗以家財殯葬持服三年奉養宣妻二十餘載及亡又衰經歛附率禮無闕自苗逮文德刺史守令卒官者制服送之五世同居門庭雍睦又梁州上言天水白石縣人趙令安孟蘭疆等四世同居行著州里詔並標榜門閭

獻文末常農北陝人王玄威立草廬於州城門外衰服蔬粥哭踊無時刺史苟頽以事表聞詔令問狀云先帝澤被蒼生玄威不勝悲慕戀心如此不知禮式詔問玄

威欲有所訴聽為表列玄威云聞諱悲號竊謂臣子同
例無所求謁及至百日乃自竭家財設四百人齋至忌
日又設百僧供至大除日詔送白紬袴褶一具與玄威
釋服下州令表異焉

孝文帝初都雒陽嘗幸北邙遂幸洪池命任城王澄侍
昇龍舟因賦詩以序懷帝曰朕昨夜夢一老公頭髻皓
白正理冠服拜立路左朕怪而問之自云晉侍中嵇紹
故此奉迎神真卑懼似有求焉澄對曰晉世之亂嵇紹

以身衛主殞命御側亦是晉之忠臣比干遭紂兇虐忠諫剖心可謂殷之良士二人俱死於王事墳塋並在於道周然陛下徒御瀝碓經殷墟而弔比干至雒陽而遺稭紹當是希恩而感夢帝曰朕何德能幽感達士也然實思追禮先賢樹揚忠懿比干稭紹皆是古之誠烈而朕務濃比干禮畧稭紹情亦有愧然既有此夢或如任城所言於是求其兆域遣使弔祭焉

郭柞從帝出征及還正授黃門車駕幸長安行經渭橋

過郭淮廟問祚曰是卿祖宗所承也祚曰是臣七世伯祖帝曰先賢後哲頗在一門祚對曰昔臣先人以通儒英博惟事魏文微臣虛薄遭奉明聖自惟幸甚因勅以太宰祭淮廟令祚自撰祭文

宣武景明三年九月車駕幸鄴詔使者弔殷比干墓董吐渾東郡小黃縣人也吐渾養兄事親至孝三世同居閨門有禮景明中畿內大使王凝奏請標異詔從之正始元年六月立周公旦夷齊廟於首陽山

李伯貴宣武時為郡守有孝行居父喪哀戚過禮遂以
毀卒帝嘉之賜渤海相

王績生滎陽京縣人也遭繼母憂居喪杖而後起及終
禮制髣髴盡落有司奏聞帝詔標旌門閭甄其徭役

劉侯仁豫州人也永平元年城人白早生殺刺史司馬
悅據城南叛悅息肱走投侯仁賊雖加購募又嚴其撫
撻侯仁終無漏泄肱遂免禍事寧有司奏其操行議免
府籍叙一小縣詔可

李謚延昌四年卒其年四門十學博士孔璠等四十五人上書論其行業帝詔曰謚屢辭徵辟志守冲素儒隱之操深可嘉美可遠傍惠康近准玄晏謚曰貞靜處士并表其門閭以旌高節於是表其門曰文德里曰孝義

高道悅為太子中庶子太子詢以道悅數規諫殺之高祖甚加悲惜謚曰貞侯至帝又追錄拜其子給事中秦榮先性至孝遭父母喪哀慕不已遂以毀卒邑里化

其孝行帝嘉之乃下詔曰孝為政本德乃化先既表天經又明地義居喪致疚至感過人窮號不反迄乎滅性行標當世理鏡幽明此而不顯道將何述可贈滄州刺史以旌厥異

晁清遼東人也祖暉濟州刺史潁川公清襲祖爵例降為伯為梁城戍將梁武攻圍糧盡城陷清抗節不屈為賊所殺帝褒美贈樂陵太守謚曰忠

孝明正光三年太保崔光奏劉昞著業涼城遺文在茲

篇籍之美頗足觀採如或愆豐當蒙數世之宥况乃維
祖逮孫相去未遠而令久淪皂隸不獲收異儒學之士
所為竊嘆臣忝職史教曾以奏聞乞勅尚書簡准所屬
甄免雜役用廣聖朝旌善繼絕敦化厲俗詔曰晒德冠
前世蔚為儒宗太保啟陳深合勸善其孫等三家特可
聽免河西人以為榮

高諒正光中為驍騎將軍徐州行臺屬元法僧反叛逼
諒同之諒不許為法僧所害時年四十一朝廷痛惜之

贈左將軍滄州刺史

馮景正光中為蕭寶寅關西大行臺都令從寶寅征討寶寅將舉兵景固諫不從寶寅敗後景還雒朝廷先聞景有諫言故免之除奉車都尉

貞孝女宗者趙郡栢仁人趙郡太守李叔裔之女范陽盧元禮之妻率性至孝聞於州里父卒號慟幾絕者數四賴母崔氏慰免之得全三年之中形骸銷瘠非人扶不起及歸夫氏與母分隔便飲食日損涕泣不絕日就

羸篤盧氏令家人慰喻不解乃遣歸寧還家乃復如故
如此者八九焉後元禮卒李追亡撫存禮無違者事姑
以孝謹著母崔以神龜元年終於雒陽凶問初到舉聲
慟絕一宿乃蘇水漿不入口者六日其姑慮其不濟親
為奔喪而氣力危殆自范陽向雒八日方達攀櫬號踊
遂卒有司以狀聞詔曰孔子稱毀不滅性蓋為其廢養
絕類也李既非嫡子而孝不勝哀雖乖俯就而志勵義
遠若不加旌異則無以勸引澆淳可追號曰貞孝女宗

易其里為孝德里標李盧二門以惇風俗

王榮世陽平館陶人也為三城戍主方城縣子梁武攻圍力窮知不可全乃先焚府庫後殺妻妾及梁軍陷城與戍副鄧元興等俱以不屈被害帝下詔褒美忠節
世爵為伯贈齊州刺史元興開國子贈雒州刺史

莊帝建義初以鄭仲明兄洪建李冲女壻仲明舅氏之親其弟與謀扶戴仲明之死也且有奉國之意乃追封安平縣開國侯邑七百戶贈侍中車騎大將軍儀同三

司尚書左僕射雍州刺史

永安初彭城石縣人孫道登初為梁武將韋休等所虜面縛臨必巡遠村塢令其招降鄉曲道登厲聲唱呼但當努力賊所不能遂屠戮之

荊州被圍行臺宗靈恩遣使宗女等四人入城曉諭為賊將所獲執女等巡城令其改辭女等大言天軍垂至堅守莫降賊忿各剗其腹然後斬首二州表其節義道登等並賜五品郡五等子爵聽子弟承襲遣使詣所在

弔祭

廢帝時刁思遵妻魯氏女也始笄為思遵所聘未踰月而思遵亡其家矜其少寡許嫁已定魯聞之自誓父母不達其志遂經郡訴稱刁民恠護寡女不使歸寧魯乃與老姑徒步詣司徒府自告情狀普泰初有司聞奏帝詔曰貞夫節婦古今同尚可令本司依式標榜

冊府元龜卷一百三十七

欽定四庫全書

子部

冊府元龜卷一百三十八

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官中書臣李荃

謄錄進士臣唐燦

欽定四庫全書

冊府元龜卷一百三十八 宋 王欽若等 撰

帝王部

旌表第二

西魏武帝永熙中以故殷州刺史鄭楷兄弟父子並死
王事朝野傷歎特贈侍中都督冀定湘三州諸軍事驃
騎大將軍儀同三司冀州刺史

倉跋滎陽京縣人也喪母水漿不入口五日吐血數升

居憂毀瘠見稱州里有司奏聞帝詔標門閭

楊弘鄉郡襄垣人也三歲喪父為叔所養母年九十三
弘年七十五哀毀過禮三年服畢恨不識父追服斬衰
食粥羸服誓終身命經十三年哀慕不改為郡縣鄉閭
三百餘人上狀稱美有司奏宜旌賞復其一門樹其純
孝詔別勅集書標楊弘至行又可假以散員之名也

弘自

以下十人史不載年
月今附於本朝之末

郭文恭太原平遙人為太平縣令年踰七十父母喪亡

丈恭孝慕罔極乃居祖父墓次晨夕拜跪跣足負土培
祖父二墓寒暑竭力積年不已見者莫不哀歎尚書聞
奏標其門閭

董維生居父喪過禮詔遣秘書中散溫紹伯奉璽書慰
之令自抑割以全孝道又詔其宗親使相喻獎勿令有
滅性之譏

王崇字乾邕陽夏雍丘人也兄弟並以孝聞身勤稼穡
以養二親仕梁州鎮南府主簿母亡扶而後起鬢髮墮

落未及將葬權殯宅西崇廬於殯所晝夜哭泣鳩鵲羣
至一小鳥素質黑眸形大如雀栖於崇廬朝夕不去母
喪始闋復丁父憂哀毀過禮是年夏風雹所經處禽獸
暴死草木摧折至崇田畔風雹便止禾麥十頃竟無損
落及過崇地風雹如初咸稱至行所感崇雖除服仍居
墓側於其室前生草一根莖葉甚茂人莫能識至冬中
復有鳥巢崇屋乳養三子毛羽成長馴而不驚守令聞
之親自臨視州以聞奏標其門閭

張昇滎陽人居父母喪鬚髮墜落水漿不入口吐血數升詔表門閭

王閭北海密人也數世同居有百口又泰山劉業興四世同居魯郡蓋雋六世同居並其財產家門雍睦鄉里敬異有司申奏皆標門閭

張安祖河陽人也襲世爵山北侯時有元承貴曾為河陽令家貧且赴尚書求選逢天寒甚凍死路側一子年幼停屍門巷棺斂無托安祖悲哭盡禮買木為棺手自

營作歛殯周給朝野嘉歎尚書聞奏標其門閭

馬八龍武邑武強人也輕財重義友人武遂縣尹靈哲
在軍喪亡八龍聞即奔赴負屍而歸以家財殯葬為制
總服撫其遺孤恩如所生州郡表列詔標門閭

李几博陵安平人也七世共居同財家有二十二房一
百九十八口長幼濟濟風禮著聞至於作役卑幼競進
鄉里嘆美標其門閭

邵洪哲上谷沮陽人也縣令范道榮先自胸城歸歎已

除縣令道榮鄉人徐孔明妄經公府訟道榮非勲道榮
坐除名羈旅孤貧不能自理洪哲不勝義憤遂代道榮
詣京師明申曲直經歷寒暑不憚劬勞道榮卒得復雪
又北鎮反亂道榮孤單無所歸附洪哲兄伯川復率鄉
人來相迎接送達幽州道榮感其誠節訴省申聞詔下
州郡標其里閭

後周太祖時荆可河東猗氏人喪母悲號擗踊絕而復
蘇者數四廬於墓側負土成墳鄉人以可孝行之至足

以勸勵風俗乃上言焉帝令州縣表異之

竇榮定文帝欲以為三公榮定上書固辭陳畏懼之道
帝乃止前後賞賜不可勝計及卒帝為廢朝令左衛大
將軍元昊監護喪事賻絹三千疋上謂侍臣曰吾每欲
致榮定於三事其人固讓不可今欲贈之重違其志於
是贈冀州刺史陳國公謚曰懿

令狐虬早以名德著聞仕歷瓜州司馬墩煌郡守郢州
刺史西魏文帝大統末卒於家帝傷悼之遣使者監護

喪事又勅鄉人為營墳壘贈龍驤將軍瓜州刺史

武帝初河東安邑人紆回性至孝武成中父母喪廬於墓側負土成墳廬前生麻一株高丈許圍之合拱枝葉鬱茂冬夏常青烏棲其上回舉聲哭烏即悲鳴時人異之帝表其閭擢授甘棠令

慕容三藏為右衛將軍周師入鄴齊後主失守東遁委三藏等留守鄴宮齊之王公以下皆降三藏猶率麾下抗拒周師及齊平帝引見禮甚厚詔曰三藏父子誠節

久聞宜加榮秩授開府儀同大將軍

建德元年晉公護誅詔曰故使持節柱國大將軍大都督陽平郡開國公李遠早蒙驅任夙著勲績內參帷幄外屬藩維竭誠王室乃罹橫禍言念貞良追增傷悼宜加榮寵用彰忠節贈本官加陝州等十五州諸軍事陝州刺史謚曰忠遠初為晉公護所害也

六年詔曰偽齊之末奸佞擅權濫罪淫刑動挂羅網偽右丞相咸陽王故斛律明月偽侍中特進開府故崔季

舒等七人或功高獲罪或直言見誅朕兵以義動剪除
凶暴表閭封墓事切下車宜追贈謚并加其見在子孫
各隨蔭叙錄家口田宅沒官者並還之

秦族性至孝母沒哭泣無時唯飲水食菜而已終喪之
後猶蔬食不入室房二十許年鄉里咸歎異之其邑人
王元達等七十餘人上狀有詔表其門閭

張元字孝始祖父成沒元號踴絕而復蘇後其父延雋
卒水漿不入口三日鄉里歎異之縣博士楊軌等二百

餘人上其狀有詔表其門閭

皇甫遐河東汾陰人遭母喪廬於墓側負土為墳郡縣表上其狀有詔旌異之

隋文帝開皇初詔曰昔漢高欽無忌之義魏武挹子幹之風前代名賢後王斯重魏故度支尚書美陽伯蘇綽文雅政事遺跡可稱展力前王垂聲著績宜開土宇用旌善人於是追封邳國公邑三千戶

宇文孝伯以忠諫為周宣帝所殺及帝踐極以孝伯及

王軌忠而獲罪並令收葬復其官爵又嘗謂高頰曰宇文孝伯實有周之良臣若使此人在朝我輩無措手處也

紆士雄回之子也少質直孝友父喪廬於墓側負土成墳其庭前有一槐樹先甚鬱茂及士雄居喪樹遂枯死服闋還宅死槐復榮帝聞之歎其父子至孝詔書褒揚號其所居為累德里

郎方貴淮南人也少有志尚與從父弟雙貴同居開皇

中方貴嘗因行出過雨淮水汎長於津所寄渡船人怒之槓方貴臂折至家其弟雙貴驚問所繇方貴具言之雙貴恚遂向津毆擊船人致死守津者執送之縣官案問其狀以方貴為首當死雙貴從坐當流兄弟二人爭為坐首縣司不能斷送詣州兄弟各引咎州不能定二人爭欲赴水而死州狀以聞而異之特原其罪表其門閭賜物百段

田德懋觀國公仁恭之子也少以孝友著名開皇初以

父軍功賜爵平原郡公授太子千牛備身丁父艱哀毀
骨立廬於墓側負土成墳高祖聞而嘉之遣員外散騎
侍郎元志就弔焉復降璽書曰皇帝謝田德懋知在窮
疾哀毀過禮倚廬墓所負土成墳朕孝理天下思弘名
教復以爾通家情義素重有聞孝感嘉歎兼深春日暄
和氣力何似宜自抑割以禮自存也兼賜緡二百疋米
百石後下詔表其門閭

杜猷為濟陰太守開皇三年死王事詔曰行仁蹈義名

教所先厲俗敦風宜見褒獎往者山東河表經此叛亂
孤城遠守多不自全濟陰太守杜猷身陷賊徒命懸冠
手郡省事范臺攻傾產營護免其戮辱眷言誠節實有
可嘉宜超常賞用明激勸臺攻可大都督假湘州刺史
薛濬開皇中為考功侍郎丁母艱不勝喪病卒有司以
聞帝為之屑涕降使齋冊書弔祭曰皇帝咨故考功侍
郎薛濬於戲惟爾操履貞和器業詳敏允膺列宿勤蹇
克彰及遘私艱奄從毀滅嘉爾誠孝感於朕懷奠酌有

加抑惟朝典故遣使人指申往命魂而有靈歆茲榮渥
嗚呼哀哉

楊慶字伯悅年二十五郡察孝廉以侍養不行其母有
疾不解襟帶者七旬及居憂哀毀骨立負土成墳齊世
表其門閭賜帛三十疋綿十屯粟五十石高祖開皇中
屢加褒賞

郭儔字引文太原文水人也家閭雍睦七葉共居犬豕
同乳烏鵲通巢時人以為義感之應州縣上其事高祖

遣平昌公宇文弢詣其家勞問之侍書御史柳或巡省
河北表其門閭

劉方為驩州都督平林邑國紀功而還方在道遇患而
卒帝甚傷惜之乃下詔曰方肅承廟筭恭行天討飲冰
遄邁視險若夷摧鋒直指出其不意鯨鯢殄殪巢穴咸
傾後不再勞肅清海外致身王事成績可嘉可贈上柱
國盧國公

煬帝大業二年五月乙卯詔曰旌表先哲式在饗祀所

以優禮賢能顯彰遺愛朕永鑒前脩尚想名德何嘗不
興歎九原屬煙千載其自古以來賢人君子有能樹聲
立德佐世救時博利殊功有益於人者並宜營立祠宇
以時致祭墳壟之時不得侵踐有司量為條式稱朕意
焉

三年四月己亥次赤岸驛以太牢祭故太師李穆

五年二月戊戌次於閩鄉詔祭開皇功臣墓三月庚午
有司言武功男子史永遵與從父昆弟同居帝嘉之賜

物一百段米二百石表其門閭

陶模為嵐州司馬漢王諒據并州反刺史喬鍾葵發兵赴逆模拒之鍾葵失色曰司馬反邪臨之以兵辭氣不撓鍾葵義而釋之軍吏進曰若不斬模何以壓衆心於是囚之於獄悉掠取資財分賜黨與及諒平帝嘉之拜開府授大興令

皇甫誕為漢王諒并州司馬諒反誕諫之為諒所囚及楊素至諒屯清源誕出獄謀閉城拒之又為諒所害煬

帝以誕亡身殉國嘉悼者久之下詔曰褒顯名節有國
通規加等飾脩抑惟令典并州總管司馬皇甫誕性理
淹通志懷審正劾官贊務聲績克宣值狂悖稱禍凶威
孔熾確殉單誠不從妖逆雖幽繫冠手而雅志彌厲遂
潛與義徒據城抗拒衆寡不敵奄致非命可贈柱國封
弘義公謚曰明

華秋汲郡臨河人也事母以孝聞母終廬於墓側大業
初調狐皮郡縣大獵有一兔人逐之奔入秋廬中匿秋

膝下獵人至廬所異之自爾此鬼嘗宿廬中馴其左右
郡縣嘉其孝感具以狀聞帝降使勞問表其門閭

翟普林楚丘人也性至孝事親以孝聞州郡辟命皆固
辭不就躬耕色養鄉鄰謂為楚丘先生後父母疾親易
燥濕不解衣者七旬大業初父母俱終哀毀殆將滅性
廬於墓側負土成墳盛冬不衣繒絮惟單縗而已家有
一烏犬隨其在墓若普林哀臨犬亦悲號見者嗟異焉
有二鵲巢其廬前樹每入其廬馴狎無所驚懼大業中

司隸巡察奏其孝感擢授孝陽令

游元大業中為侍御史奉使黎陽楊玄感作亂元數其罪玄感怒而囚之屢脅以兵竟不屈節於是害之帝甚加歎贈銀青光祿大夫賜縑五百疋拜其子仁宗為正議大夫弋陽郡通守

松贊大業末為石門府掾正賊帥楊厚執之令告北海縣云郡兵已破宜早歸降贊至城下言賊弱不足憂遂為厚所害帝遣戶曹郎郭子賤討厚破之以贊亡身殉

節嗟悼不已上表奏之優詔褒揚贈朝散大夫本郡通守

唐高祖武德元年八月以高頴賀若弼張衡宇文弼薛道衡董純等忠於前朝李金才李敏見忌隋室皆被煬帝所誅於是贈其官爵

裴仁基初仕隋為左光祿大夫陷於王世充後謀歸國事洩遇害武德中贈原州都督謚曰忠

二年五月詔曰民稟五常仁義斯重士有百行孝敬為

先自古哲王經邦致治設教垂範莫尚於茲叔世澆訛
民多偽薄脩身克已事資誘勸朕恭膺靈命臨馭遐荒
愍茲弊俗方思遷道雍州萬年縣樂遊鄉民王世貴孝
性自天力行無怠喪其所怙哀毀絕倫負土成墳結廬
墓側鹽酪之味在口不嘗哭泣之聲感於行路安福鄉
民宋興貴立操雍和主情友睦同居合爨累世積年務
本力農崇謙履順弘長名教敦厲風俗宜加褒顯以勸
將來可並旌表門閭蠲免課役布告天下使明知之

四年表南豐州漢陽縣令姜世雄之間褒義門也世雄立性仁厚夙敦教義私門之內友悌著聞累葉共居合宗同爨鄉黨稱慕曾無間言屬隋末寇盜經其里者皆感其義節不忍侵掠帝聞而嘉尚言其孝行堪勵風俗下詔褒美課役並從蠲免

楊太寶武德初為龍門令劉武周陷晉絳攻之不降城破被害褒贈全節侯

劉感岐州鳳泉人後魏司徒高昌王豐生之孫也武德

初以驃騎將軍鎮涇州薛仁果率衆圍之感嬰城拒守
城中糧盡遂殺所乘馬以分將士將士感之一無所噉
唯煮馬骨取汁和木屑食之城垂陷者數以長平王叔
良援兵至仁果解圍而去感與叔良出戰為賊所擒仁
果復圍涇州令感語城中云援軍已敗徒守孤城何益
也宜早出降以全家室感及至城下大呼曰逆賊饑餓
亡在朝夕秦王率數十萬衆四面俱集城中勿憂宜各
自勉以全忠節仁果大怒執感於城邊埋脚馳騎射殺

之至死聲色逾厲賊平帝購得其屍祭以少牢贈瀛州刺史封平原郡公謚曰忠壯令其子襲官爵并賜田宅常達陝人也初仕隋為鷹擊郎將數從帝征伐甚蒙親待及義兵起達在霍邑從宋老生來拒戰老生敗達懼自匿不出高祖謂達已死令人閱屍求之及達來見高祖大悅以為統軍武德初拜隴州刺史時薛舉屢攻之不能克乃遣其將仵士政以數百人偽降達達不之察厚加撫接士政伺隙以其徒劫達擁城中二千人而叛

牽達以見於舉達詞色抗厲不為之屈舉指其妻謂達曰識皇后不達曰止是癯老嫗何足可識竟釋之有奴賊帥張貴謂達曰汝識我不達曰汝逃死奴瞋目視之貴怒持刀將斧達人救獲免及仁杲平帝見達謂曰卿之忠節便可求之古人命起居舍人令狐德棻曰劉感常達須載之史策也執忤士政撲殺之賜達布帛三百段復拜隴州刺史

魏衡妻王氏梓州郫人也武德初薛仁杲舊將旁企地

侵掠梁部因獲王氏逼而妻之後企地漸強盛衡謀以城應賊企地領衆將趨梁州未至數十里飲酒醉卧王氏取其佩刀斬之攜其首入城衆乃散帝大悅封為崇義夫人仍赦衡同賊之罪

獨孤武都謀叛王世充歸國事覺誅死武都子師仁年始三歲世充以其年幼不殺使禁掌之乳母王氏號蘭英請髡鉗求入保養世充許之蘭英撫育提攜備盡筋力時喪亂年饑人多餓死蘭英扶路乞丐招拾遇有所

得便歸與師仁蘭英唯啖土飲水而已後詐採拾乃竊
師仁歸於京師帝嘉其義下詔曰師仁乳母王氏慈惠
有聞撫鞠無倦提攜遺幼背逆歸朝宜有褒隆以賜其
號可封永壽鄉君

張善相許州襄城人也大業末為里長每督縣兵逐小
盜為衆所附遂據本郡歸於李密密敗以城歸國帝授
伊州總管王世充數攻之善相頻遣使請救兵既不赴
城中糧盡自知必敗謂寮屬曰吾荷國恩要當効命諸

君無為同死當斬吾頭以歸世充衆皆泣曰寧與公同死終不獨生後城陷被禽送於世充所辭色不撓罵世充極口尋被害帝歎曰吾負善相善相不負吾封其子為襄城郡公

張志寬河東安邑人也武德八年丁母憂廬於墓側負土成墳有烏巢於廬前樹上志寬哭臨烏輒悲鳴帝聞之遣使就第弔授員外散騎常侍賜物三百段表其門

閤

太宗貞觀元年勅召臨淮劉子翼入京辭以繼母年老不赴色養之美鄉里稱焉江南道大使李襲譽奏旌表之仍賜以米布改所居為孝慈里及母卒摧毀傷感行路

二年九月涇陽人田伯明高陵寡婦李氏各賜帛三十疋旌孝義也

六年正月蠲布衣邊鳳舉韋引宗崔定仁陳嗣等四家課役褒孝義也鳳舉渤海人引宗邑西人並以至孝聞

於鄉黨葬父母皆廬墓次負土成墳鳳舉植栢而為嘉樹引宗廬前生芝草七十餘莖見者以為孝感丁父母憂縗服齋居二十餘年不釋定仁博陵人為偶像晨昏定省若平生焉隋末羣賊蜂起莫有侵掠者嗣隴西人四葉同居稱為邕睦帝異之並下書褒美

七年十一月以少牢祭杜如晦杜淹李綱之墓

十二年二月帝幸長春宮表王隴德之閭褒節義也隴德本馮翊人王藏仁之蒼頭也藏仁父母先歿未獲合

葬既而從役物故其妻孀居旁無親屬隴德迎致其屍并其父母而葬之因廬其墓次負土成墳每有白雉悲鳴於墳上焉

十月表通事舍人薛萬備之間旌孝行也萬備者營州都督萬淑之季弟也初丁母艱截髮為髦以充歛及葬廬於墓次負土成墳帝聞而嘉之降璽書弔慰焉

十五年二月表華州鄭人王瞿曇之間旌孝行也瞿曇事親以孝養聞閭里稱其敬讓葬祖父母及伯父皆負

土成墳三年乃畢母終亦如之晝夜悲號哀感行路頭
髮盡落形體枯悴墓門三年不掩夜嘗寢於棺側服終
之後仍不離墓焉

十一月壬戌賜孝女夏侯碎金布帛二十段粟十石仍
標其門閭碎金滑州胙城人先適河間劉氏已產一女
其父因疾喪身碎金遂求離其夫以終侍養夫不違其
志分留一女碎金供養其父兼事後母以孝聞鄉里方
之曾聞父亡號哭之聲朝夕不絕哀毀之至殆不勝喪

寒不衣絮被髮徒跣負土成墳廬於墓側至是已歷五
年日一食而止

十七年齊王祐舉兵祐初遣沓君暮將數百騎擊平陵
平陵人拒守獲全詔嘉之改平陵為全節縣

十九年二月庚戌輿駕發雒陽丁巳詔曰昔望諸列國
之相漢主尚求其後夷吾霸者之臣魏君猶禮其墓况
正直之道邁青松而孤絕忠勇之操掩白玉而振彩者
哉殷故少師比干貞一表德鄰幾成性以明允之量屬

無妄之辰玉馬遽馳愍其邦之殄悴寶衣將燎惜其君
之覆亡其義不回懷忠蹈節讜言纔發輕百齡之命淫
刑既逞碎七尺之軀雖復周王封墓莫救焚園之禍孔
聖稱仁寧追剖心之痛朕自趙魏問罪遼碣經途秀麥
之墟緬懷梓林之地駐蹕而瞻荒隴願以為臣撫躬而
想幽泉思聞其諫豈可使慎終之義久闕於往冊易名
之典無聞於後代宜錫寵命以展宿心可追贈太師謚
曰忠烈所司崇其墓而葺祠堂州縣春秋二時祀以少

牢給隨近五戶以供灑掃帝自為祭文

壬戌次安陽遣使以少牢祭齊清河王高岳之墓

是年帝征遼攻安市城不剋其城中皆屏聲偃幟城主
升城拜手奉辭太宗嘉其堅守賜絹百足以勵事君之

節

又遼東城長史為部下所殺而省事

省事郡吏也

攜其妻子

奔白巖城降帝義之賜省事帛五疋仍為造靈輿歸平壤

二十一年二月甲戌賜滑州胙城女子劉少娘粟帛仍表其閭旌孝行也少娘母夏侯碎金亦以至孝聞少娘年十五而母亡遂廬於墓側負土成墳

許垣豫州人也年十歲父入山採藥為猛獸所噬即號叫以杖擊之獸遂奔走父得以全帝聞而謂侍臣曰垣雖幼童遂能致命救親至孝自表深可嘉尚授文林郎賜物五十段

堯君素隋大業末為鷹揚郎將鎮河中義兵起固守不

下高祖遣其妻至城下說令降君素引弓射殺後人心
離叛左右斬之傳首京師梟於都市後帝幸河中歎其
忠於隋室贈蒲州刺史以勵事君

楊三安妻李氏雍州涇陽人也事舅姑以孝聞及舅姑
亡沒三安亦死二子孩童家貧寡李晝則力田夜則紡
績數年間畢舅姑及夫之叔姪兄弟七喪深為遠近所
嗟尚帝聞而異之賜帛二百段遣州縣存恤

孝女衛氏字無忌絳州夏縣人也初其父為鄉人衛長

則所殺無忌時年六歲母又改嫁更無兄弟及長嘗思復讎無忌從伯嘗設宴為樂長則時亦預坐無忌以博擊殺之既而詣吏稱父讐既報請就刑戮巡察大使黃門侍郎褚遂良以聞帝嘉其孝烈特令免罪給傳乘徙於雍州并給田宅仍令州縣以禮嫁之

王少玄者博州聊城人也父隋末於郡西為亂兵所害少玄遺腹生年十餘歲問父所在其母告之因哀泣便欲求屍以葬時白骨蔽野無繇可辨或曰以子血霑父

骨即滲入馬少玄乃刺其體以試之凡經旬日竟獲父骨以葬盡體病創歷年方愈貞觀中本州聞薦拜除王府參軍

阿史那杜爾本突厥處羅可汗第二子貞觀中為行軍總管以高昌凱旋帝謂杜爾曰諸軍並分外求財爾獨能不取深可尚也高昌有一寶鈿刀是其國所寶即以賜之并雜絲千段

李乾祐為侍御史母卒廬於墓側負土成墳帝遣使就

弔仍旌表其門

高宗永徽三年九月以周司沐大夫裴融尚書左丞封孝琰有忠節於前代制擢其子孫以旌介烈

五年二月庚申故雒州都督贈尚書左僕射屈突通故吏部尚書贈陝東道大行臺尚書右僕射殷開山並贈司空故澤州刺史贈荊州都督邳國公長孫順德贈開府儀同三司故左領軍大將軍竇琮贈特進故右武衛大將軍史大柰贈輔國大將軍故禮部尚書溫大雅贈

尚書右僕射故太僕卿贈兵部尚書權引壽贈太子少
師故洪州都督贈戶部尚書劉政會故荊州都督贈禮
部尚書應國公武士彟並贈并州都督故襄州都督贈
左驍衛大將軍張公謹贈荊州都督故資州刺史李高
遷贈涼州都督故嘉州刺史李思行贈洪州都督故右
光祿大夫張平高贈潭州都督並追錄武德功臣也
六年正月親謁昭陵詔貞觀以來勲賢大臣陪葬者宜
以少牢於墓致祭其子孫有淪屈者所司奏聞

三月丁酉遣比部員外李文禮致祭名臣圖形於凌煙閣者凡七人故太子太師魏徵右僕射高士廉特進蕭瑀輔國大將軍段志玄夔國公劉弘基徐州都督秦叔寶秘書監虞世南皆始終著名者也

四月丙寅鎮軍大將軍阿史那杜爾卒贈并州都督陪葬昭陵謚曰元仍令起冢象葱山以旌平龜茲之功也顯慶元年八月賜相州司兵參軍武弘度宋州人程表師粟帛標其門閭旌孝行也

二年二月高宗在雒陽宮遣使祭伊尹周公伯夷叔齊
許由等廟十月車駕幸許州次白善頓遣有司祭鄭子
產及漢太丘長陳實之墓

五年二月車駕幸并州其義旗初職事五品已上身亡
沒墳墓在州者令所司致祭

麟德元年十月己卯詔曰周京兆尹少冢宰廣陵郡守
宇文孝伯忠亮基心貞堅表志淫刑既逞方納諫而求
人忍忌將加甘捐軀而殉節年紀雖永風烈猶生宜峻

徽章式旌華胄其孫左威衛長史思純可朝散大夫

二年十月命有司致祭伊尹周公桓榮楊彪杜預等墓
及祠廟

十一月己卯至滎陽祭祀信墓追贈驃騎大將軍

三年有事秦山路過鄆州聞壽張人張公藝九世同居

帝親幸其宅問其義繇其人請紙筆但書百餘忍字帝

為之流涕賜以縑帛焉

初北齊安王高樂詣宅慰撫旌表隋開皇中大夫邵陽公梁子

恭親慰撫重表其門貞觀中特勅史加旌表

咸亨三年十月丁亥詔脩葺傅說祠廟仍令所司少牢致祭

儀鳳二年吐蕃寇扶州之臨河鎮鎮將杜孝昇為賊所執賊令送書松州以邀其降孝昇身遭六鎗竟不從俄而賊衆捨孝昇而退又率餘衆拒守詔贈孝昇游擊將軍以旌其忠烈仍賜物二百段孝昇俄以創甚去職詔令給祿終身

三年九月詔賜雍州司法參軍楊誼故妻韋氏物百段

旌孝行也韋氏鄜州刺史吉甫之女其父初嬰疾累月不解衣而寢及父卒一慟而絕帝嘉其至行特賜繡帛仍令編入國史

永隆二年四月贈故吉州長史陳行焉陸州刺史旌忠節也初行焉使吐蕃吐蕃大臣欽陵使行焉拜伏行焉擁節不屈臨之以兵竟不從因被拘留十餘年而卒至是喪還帝深嘉歎之故贈官焉

永淳二年正月車駕發東遣使祭巢父許由等祠廟

五月以雍州人元讓為太子右內率府長史旌孝行也
讓弱冠明經擢第以母疾遂不求仕躬親樂膳蒸蒸致
養不出閭里十餘年及母終廬於墓側蓬髮不櫛沐菜
食飲水而已咸亨中孝敬監國下令表其門閭至是巡
察使奏讓孝悌殊異繇是拜職

孝女賈氏濮州鄆城人也年始十五其父為宗人玄基
所害其弟疆仁年幼賈氏撫育之誓以不嫁及疆仁成
童思共報復乃候玄基殺之取其心肝以祭父墓遣疆

仁自列於縣司斷以極刑賈氏詣闕自陳已為請代疆
仁死帝哀之特下制賈氏及疆仁免罪移其家於雒陽
東夷都護張儉第二女左千牛敏直之妻性至孝數歲
時父母微有病急即觀察顏色晝夜不離左右初聞儉
有疾自傷不獲奔赴期於必死及凶問至號叫一慟而
絕帝聞之下詔褒美贈物一百段仍令編入國史

楊紹宗妻王氏華州華陰人也初年二歲所生母亡為
繼母鞠養至年十五父又征遼而歿繼母尋亦卒王乃

收所生及繼母屍柩并立父形像招魂遷葬訖廬於墓側培其祖及父母墳永徽中詔曰故楊紹宗妻王氏因心為孝率性成道年迫桑榆筋力衰謝以往在隋朝父歿遼左招魂遷葬負土成墳又葬其祖父母等竭此老年親加板築痛結晨昏哀感行路永言志行嘉尚良深宜標其門閭用旌敏德賜物三十段粟五十石

蘇定方為左武衛大將軍卒帝傷惜久之謂侍臣曰蘇定方於國有功例合褒贈卿嘗不言遂使哀榮未及興

言及此不覺嗟悼遽下詔贈幽州都督謚曰莊

冊府元龜卷一百三十八